



Jadual Pembacaan Khutbah Jumaat

Siri 3/ 2024 (Mac Tahun 2024)

Bil.	Tajuk	Tarikh
1.	REFORMASI KOREKSIONAL MEMBANGUN PERADABAN	1 Mac 2024M/ 20 Syaaban 1445H
2.	PERSIAPAN BERTEMU MADRASA RAMADHAN	8 Mac 2024M/ 27 Syaaban 1445H
3.	SEPERTIGA MALAM ANUGERAH TERINDAH	15 Mac 2024M/ 4 Ramadhan 1445H
4.	Khutbah sempena Nuzul al-Quran: MENGHAYATI TUJUAN AL-QURAN DITURUNKAN	22 Mac 2024M/ 11 Ramadhan 1445H
5.	TAWARAN EKSKLUSIF RAMADHAN	29 Mac 2024M/ 18 Ramadhan 1445H
Khutbah Kedua		

Dibiayai oleh:



Zakat Pulau Pinang

Diterbitkan oleh:



Jabatan Hal Ehwal Agama
Islam Pulau Pinang

Jawatankuasa Panel Semakan Teks Khutbah Negeri Pulau Pinang

- 1. SS Dato' Seri Dr. Haji Wan Salim bin Wan Mohd Noor
(Pengerusi)**
Mufti Kerajaan Negeri Pulau Pinang
- 2. YBhg. Ustaz Muhammad Fadzil bin Alias**
Pengarah, Yayasan Dakwah Islamiyah (YADIM) Pulau Pinang
- 3. YBhg. Ustaz Ahmad bin Hashim**
Penasihat, Pusat Pengajian Tahfiz Al-Quran (PPTQ)
Kolej Islam Teknologi Antarabangsa Pulau Pinang (KITAB)
- 4. YBhg. Ustaz Subki bin Mohamed**
Mantan Pensyarah Kanan, IPG Kampus Tuanku Bainun
- 5. YBhg. Dr. Mohamad Zaki bin Hj Abdul Halim**
Penolong Mufti, Bahagian Fatwa,
Jabatan Mufti Negeri Negeri Pulau Pinang
- 6. YBhg. Ustazah Rohayati binti Daud**
Mantan Penyelaras Program Intervensi Kaunseling,
Universiti Sains Malaysia
- 7. YBhg. Tuan Ahmad Shahimi bin Senawi**
Pendakwah
- 8. Ustaz Mohd Hanif bin Omar @ Wahab
(Setiausaha)**
Ketua Penolong Pengarah, Bahagian Dakwah
Jabatan Hal Ehwal Agama Islam Pulau Pinang (JHEAIPP)



Khutbah Sempena Nuzul al-Quran

MENGHAYATI TUJUAN AL-QURAN DITURUNKAN

22 Mac 2024M/ 11 Ramadhan 1445H

الْحَمْدُ لِلَّهِ الَّذِي اخْتَصَّ شَهْرَ رَمَضَانَ بِمَزِيدٍ مِنَ الْفَضْلِ وَالْإِكْرَامِ، وَجَعَلَهُ مَوْسِمًا
لِتَحْقِيقِ التَّقْوَى وَالتَّلَخُّصِ عَنِ الْآثَامِ.
أَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ الْمَلِكُ الْعَلَّامُ، وَأَشْهَدُ أَنَّ نَبِيَّنَا مُحَمَّدًا
عَبْدُهُ وَرَسُولُهُ سَيِّدُ الْآنَامِ.
اللَّهُمَّ صَلِّ وَسَلِّمْ وَبَارِكْ عَلَى سَيِّدِنَا مُحَمَّدٍ وَعَلَى آلِهِ وَأَصْحَابِهِ الْكِرَامِ.
أَمَّا بَعْدُ؛ فَيَا أَيُّهَا النَّاسُ؛ أَوْصِيكُمْ وَنَفْسِي بِتَقْوَى اللَّهِ وَطَاعَتِهِ لَعَلَّكُمْ تَتَّقُونَ.

SIDANG JUMAAT YANG DIRAHMATI ALLAH SEKALIAN,

Saya berpesan buat diri saya dan tuan-tuan sekalian, marilah kita bertaqwa kepada Allah **سُبْحَانَهُ وَتَعَالَى**, dengan melaksanakan segala perintah-Nya dan menjauhi segala yang dilarang. Sesungguhnya perintah dan larangan Allah itu dapat difahami dengan mempelajari dan menghayati Kitab yang telah diturunkan-Nya iaitu al-Quran. Ia telah mula diturunkan dalam bulan Ramadhan sejak lebih 1,400 tahun yang lalu.

Sebelum meneruskan bicara, khatib ingin berpesan kepada para jemaah yang mulia. Jangan bersembang-semang, berkata-kata, tutup semua gajet dan jangan sampai tertidur dengan sengaja. Dengarlah



khatib berbicara agar boleh dikutip pengajarannya. Tajuk khutbah hari ini ialah: **“Menghayati Tujuan al-Quran Diturunkan.”**

HADIRIN SIDANG JUMAAT SEKALIAN,

Al-Quran adalah kata-kata Allah yang menakjubkan, yang diturunkan kepada Nabi ﷺ yang tertulis pada mashaf, disampaikan dengan periwayatan yang sempurna dan menjadi ibadah apabila membacanya. Itulah antara pengertian al-Quran agar kita mengenalinya, membaca dan berusaha untuk memahaminya.

Bersempena Nuzul al-Quran, marilah kita imbas kembali peristiwa besar ini. Nuzul al-Quran dalam bulan Ramadhan mengandungi dua maksud utama, iaitu:

Pertama: Turunnya secara keseluruhan dari *Luh al-Mahfuz* ke *Baitul ‘Izzah* di langit dunia pada malam al-Qadr dalam bulan Ramadhan.

Kedua: Al-Quran adalah wahyu Allah buat kali pertamanya diturunkan kepada Rasulullah ﷺ pada malam ke 17 dalam bulan Ramadhan, 13 tahun sebelum hijrah Baginda ke Madinah.

SIDANG JUMAAT YANG BERBAHAGIA,

Bulan Ramadhan juga disebut sebagai *Syahrul Quran* iaitu bulan al-Quran kerana padanya diturunkan al-Quran yang merupakan mukjizat teragung Rasulullah. Sekaligus merupakan Kitab panduan hidup bagi umat manusia. Al-Quran yang mulia adalah wahyu Ilahi yang membawa sinaran cahaya untuk menerangi kehidupan manusia sejagat ke arah kesejahteraan hidup di dunia dan kebahagiaan di akhirat.



Sesungguhnya, tujuan al-Quran diturunkan telah dijelaskan dalam Surah an-Nahl ayat 44:

... وَأَنْزَلْنَا إِلَيْكَ الذِّكْرَ لِتُبَيِّنَ لِلنَّاسِ مَا نُزِّلَ إِلَيْهِمْ وَلَعَلَّهُمْ يَتَفَكَّرُونَ ﴿٤٤﴾

Maksudnya: *“Dan kami turunkan kepadamu (wahai Muhammad) al-Quran yang memberi peringatan, supaya engkau menerangkan kepada umat manusia akan apa-apa yang telah diturunkan kepada mereka dan supaya mereka memikirkannya.”*

Seterusnya supaya ia dijadikan hukum pemutus antara manusia. Firman-Nya dalam Surah an-Nisa’ ayat 105:

إِنَّا أَنْزَلْنَا إِلَيْكَ الْكِتَابَ بِالْحَقِّ لِتَحْكُمَ بَيْنَ النَّاسِ بِمَا أَرَاكَ اللَّهُ وَلَا تَكُنَ لِلْخَائِنِينَ خَصِيمًا ﴿١٠٥﴾

Maksudnya: *“Sesungguhnya Kami menurunkan kepadamu (wahai Muhammad) Kitab (al-Quran) dengan membawa kebenaran, supaya kamu mengadili di antara manusia menurut apa yang Allah telah tunjukkan kepadamu (melalui wahyu-Nya); dan janganlah engkau menjadi pembela bagi orang-orang yang khianat.”*

HADIRIN JUMAAT SEKALIAN,

Al-Quran adalah ibarat imam yang mesti kita turuti. Justeru sesiapa yang berpegang teguh dengan segala ajaran yang terkandung di dalamnya, maka ia akan berbahagia, sebaliknya sesiapa yang menolak atau meninggalkan ajaran al-Quran, maka dia termasuk dalam kalangan

manusia yang tersesat sebagaimana dijelaskan oleh Allah **سُبْحَانَهُ وَتَعَالَى** dalam Surah al-Baqarah ayat 185 yang bermaksud:

Maksudnya: *“(Diwajibkan kamu berpuasa pada) bulan Ramadhan, yang diturunkan padanya al-Quran sebagai petunjuk bagi manusia dan penjelasan mengenai petunjuk itu dan (menjelaskan) perbezaan (antara yang hak dan batil).”*

Dalam hal ini, ibn *Taimiyah* menegaskan bahawa sesiapa yang tidak membaca al-Quran bermakna dia telah meninggalkan (menjauhkannya), begitu juga kepada sesiapa yang membaca al-Quran tapi tidak pula memahami maknanya, dia juga telah meninggalkan al-Quran. Sesiapa pula yang membaca al-Quran dan dia telah memahami maknanya, tapi tidak mengamalkannya pula, dia tetap juga telah meninggalkan al-Quran.

MUSLIMIN YANG DIRAHMATI ALLAH SEKALIAN,

Sesungguhnya bulan Ramadhan ini merupakan peluang keemasan bagi seseorang muslim untuk merenung dan bermuhasabah tentang kewajipannya terhadap Kitab suci al-Quran. Di antara kewajipan yang paling utama adalah setiap muslim hendaklah meyakini al-Quran merupakan Kitab suci daripada Allah **سُبْحَانَهُ وَتَعَالَى** bukannya ciptaan manusia mahupun ciptaan Nabi Muhammad **صَلَّى اللَّهُ عَلَيْهِ وَسَلَّمَ**.

Justeru, beriman kepada al-Quran termasuk dalam salah satu rukun iman yang enam yang menjadi tonggak utama kepada Islam yang diredhai Allah. Firman-Nya dalam Surah al-Baqarah ayat 1 dan 2:

آلَمْ ۝ ذَٰلِكَ الْكِتَابُ لَا رَيْبَ فِيهِ هُدًى لِّلْمُتَّقِينَ ۝

Maksudnya: “Alif Lam Mim, Kitab al-Quran ini tidak ada sebarang syak padanya. Ia pula menjadi petunjuk kepada orang yang beriman.”

Al-Quran adalah sumber kebenaran yang tiada keraguan padanya, dan sarat dengan panduan-panduan hidup. Ia berupaya memajukan setiap muslim dalam semua lapangan hidup, meliputi akhlaknya, kebudayaannya dan ilmu pengetahuan untuk mencapai ke peringkat yang tidak dapat ditandingi oleh umat lain di dunia.

Tegasnya, Al-Quran adalah sumber ilmu pengetahuan dalam pelbagai disiplin ilmu sehingga terbentuk satu prinsip kerukunan hidup yang serba lengkap, meliputi keperluan duniawi dan ukhrawi. Dalam kata lain, al-Quran sewajarnya diangkat sebagai teras dan sumber rujukan utama yang mendasari seluruh aspek kehidupan manusia.

Janganlah pula menjadikan al-Quran semata-mata sebagai hiasan di dinding-dinding rumah atau hiasan yang dipamerkan untuk mengambil barakah dan sebagainya.

Inilah satu-satunya kitab *Samawi* yang tinggal pada kita hari ini. Kitab yang mencatatkan segala bicara Allah **سُبْحَانَهُ وَتَعَالَى** kepada kita. Marilah kita memuliakan kitab ini dengan membacanya setiap hari. Marilah kita hargai kitab ini, dengan berusaha memahami isi kandungannya, yang ditujukan kepada kita sendiri, sebagai manusia. Marilah kita tatap dan hargai risalah Allah ini, lebih daripada kita menghargai kekasih atau anak sendiri.

Marilah kita beri perhatian yang lebih daripada kita memberi perhatian kepada mesej di *Whatsapp*, *Facebook* dan sebagainya. Ayuh kita faham risalah Tuhan ini, lebih daripada usaha kita memahami surat yang kita terima dari pemerintah atau mahkamah yang memberi amaran kepada kita.

Sesungguhnya, kitab inilah satu-satunya panduan utama bagi manusia yang kekal terpelihara. Allah telah menjamin al-Quran ini terpelihara hingga Hari Kiamat. Bukan hanya sebagai selingan ketika sunyi atau menghadapi gangguan makhluk halus. Sebaliknya, al-Quran adalah panduan harian, yang membimbing kita dalam menghadapi masalah dan cabaran kehidupan. Bahkan sebagai panduan hidup bermasyarakat dan bernegara. Barulah kita benar-benar menghargai al-Quran dan memahami tujuan ia diturunkan oleh Allah **سُبْحَانَهُ وَتَعَالَى**.

HADIRIN SIDANG JUMAAT SEKALIAN,

Marilah kita mengajak ahli keluarga, saudara-mara, jiran tetangga, sahabat handai dan seluruh kenalan kita untuk sentiasa mendampingi al-Quran. Peruntukkanlah masa setiap hari untuk membacanya, memahami makna dan sentiasa mengambil iktibar dengan melaksanakan tuntutan-tuntutannya dalam kehidupan kita.

Marilah kita bermuhasabah, dengan melihat dalam diri kita masing-masing secara ikhlas dan penuh keinsafan, berapakah masa kita peruntukan untuk membaca, belajar dan mendalami al-Quran setiap hari, setiap bulan atau setiap tahun? Mampukah kita menjawab pertanyaan Allah **سُبْحَانَهُ وَتَعَالَى** tentang di manakah duduk letaknya al-Quran dalam kehidupan kita ketika ini, berbanding perkara atau urusan-urusan lain

yang menjadi keutamaan. Ingatlah firman Allah dalam Surah al-Furqan ayat 30 dan 31 yang menggambarkan keluhan Rasulullah ﷺ tentang sikap manusia terhadap Kitab yang agung ini.

وَقَالَ الرَّسُولُ يَرْبِّ إِنَّ قَوْمِي اتَّخَذُوا هَذَا الْقُرْآنَ مَهْجُورًا ﴿٣٠﴾ وَكَذَلِكَ جَعَلْنَا لِكُلِّ نَبِيٍّ عَدُوًّا مِّنَ الْمُجْرِمِينَ ۖ وَكَفَىٰ بِرَبِّكَ هَادِيًا وَنَصِيرًا ﴿٣١﴾

Maksudnya: “Dan berkatalah Rasul “Wahai Tuhanku sesungguhnya kaumku telah menjadikan al-Quran ini satu perlembagaan yang ditinggalkan, tidak dipakai. Dan demikianlah Kami jadikan bagi tiap-tiap Nabi, musuh dari kalangan orang-orang yang berdosa; dan cukuplah Tuhanmu (wahai Muhammad) menjadi Pemimpin (ke jalan mengalahkan mereka) serta menjadi penolong (bagimu terhadap mereka).”

Semoga kita tidak tergolong di kalangan manusia yang disebut dalam ayat tadi. نَعُوذُ بِاللَّهِ مِنْ ذَلِكَ.

SIDANG JUMAAT YANG DIMULIAKAN,

Sebenarnya makna beriman kepada al-Quran ialah menuntut kita melaksanakan beberapa ciri atau kewajipan. Antara tuntutan yang mesti kita laksanakan ialah:

Pertama: Setiap muslim dianjurkan supaya sentiasa mempelajari al-Quran dan mengajarkannya kepada orang lain. Sabda Rasulullah ﷺ:

خَيْرُكُمْ مَنْ تَعَلَّمَ الْقُرْآنَ وَعَلَّمَهُ

Maksudnya: “*Sebaik-baik kamu adalah orang yang mempelajari al-Quran (membaca dan memahami maknanya) dan mengajarkannya.*”

(Hadis Riwayat Al-Bukhari)

Kedua: Kita digesa supaya rajin membaca al-Quran sebagaimana sabda Nabi ﷺ, yang bermaksud “*Bacalah al-Quran kerana al-Quran akan datang pada Hari Kiamat memberi syafaat kepada pembacanya.*”

Ketiga: Setiap muslim dituntut supaya memahami dan menghayati maksud, makna, pengertian dan pengajaran yang tersurat dan tersirat dalam Kitab al-Quran.

Perlu ditegaskan bahawa membaca al-Quran bukan sahaja digalakkan dalam bulan Ramadhan, bahkan juga dianjurkan dalam bulan-bulan yang lain sepanjang tahun. Kita digalakkan meningkatkan kuantiti dan kualiti pembacaan al-Quran terutamanya dalam bulan Ramadhan kerana Allah menyediakan ganjaran pahala yang berlipat ganda kepada orang yang melakukan amal soleh dalam bulan yang mulia ini.

SIDANG JEMAAH YANG DIHORMATI SEKALIAN,

Sempena bulan Ramadhan yang Mubarak ini, marilah kita sama-sama bermuhasabah dan menilai diri, apakah keimanan kita kepada al-Quran sudah pun menepati ketiga-tiga ciri yang disebut tadi. Jika belum, bersegeralah berbuat perubahan diri agar kehidupan kita kelak mendapat jaminan keselamatan dan keredhaan Allah ﷻ di dunia dan di akhirat.

إِنَّ هَذَا الْقُرْآنَ يَهْدِي لِلَّتِي هِيَ أَقْوَمُ وَيُبَشِّرُ الْمُؤْمِنِينَ الَّذِينَ يَعْمَلُونَ الصَّالِحَاتِ أَنَّ لَهُمْ أَجْرًا كَبِيرًا ﴿٩﴾

Maksudnya: “Sesungguhnya al-Quran ini memberi petunjuk ke jalan yang amat benar (agama Islam) dan menyampaikan berita menggembirakan bagi orang yang beriman yang mengerjakan amal-amal soleh, bahawa mereka beroleh pahala yang amat besar.”

(Surah al-Isra' ayat 9)

بَارَكَ اللَّهُ لِي وَلَكُمْ فِي الْقُرْآنِ الْعَظِيمِ، وَنَفَعَنِي وَإِيَّاكُمْ بِهِدْيِ سَيِّدِ الْمُرْسَلِينَ،
أَقُولُ مَا سَمِعْتُمْ، وَأَسْتَغْفِرُ اللَّهَ لِي وَلَكُمْ، وَلِسَائِرِ الْمُسْلِمِينَ مِنْ كُلِّ ذَنْبٍ،
فَاسْتَغْفِرُوهُ، إِنَّهُ هُوَ الْغَفُورُ الرَّحِيمُ.



Khutbah Kedua Bulan Mac

2024M/ 1445H

الْحَمْدُ لِلَّهِ عَلَى الْآلَاءِ وَإِحْسَانِهِ، وَالشُّكْرُ لَهُ عَلَى تَوْفِيقِهِ وَامْتِنَانِهِ،
وَأَشْهَدُ أَنْ لَا إِلَهَ إِلَّا اللَّهُ وَحْدَهُ لَا شَرِيكَ لَهُ تَعْظِيمًا لِسَانِهِ،
وَأَشْهَدُ أَنَّ مُحَمَّدًا عَبْدُهُ وَرَسُولُهُ دَاعِيًا إِلَى رِضْوَانِهِ.
صَلَّى اللَّهُ وَسَلَّم عَلَى سَيِّدِنَا مُحَمَّدٍ وَعَلَى آلِهِ وَصَحْبِهِ، عَدَدَ خَلْقِهِ وَرِضَا نَفْسِهِ،
وَزِنَةَ عَرْشِهِ وَمِدَادَ كَلِمَاتِهِ.
أَمَّا بَعْدُ، فَيَا عِبَادَ اللَّهِ، اتَّقُوا اللَّهَ تَعَالَى رَبَّكُمْ حَقَّ تَقَاتِهِ، وَاعْمَلُوا بِطَاعَتِهِ
وَمَرْضَاتِهِ، ثُمَّ اْعْلَمُوا أَنَّ اللَّهَ سُبْحَانَهُ وَتَعَالَى أَمْرُكُمْ بِأَمْرِ بَدَأَ فِيهِ بِنَفْسِهِ؛ فَقَالَ عَلِيمًا
حَكِيمًا:
إِنَّ اللَّهَ وَمَلَائِكَتَهُ يُصَلُّونَ عَلَى النَّبِيِّ يَا أَيُّهَا الَّذِينَ ءَامَنُوا صَلُّوا عَلَيْهِ وَسَلِّمُوا تَسْلِيمًا

﴿الأحزاب: 56﴾

اللَّهُمَّ صَلِّ وَسَلِّمْ عَلَى عَبْدِكَ وَرَسُولِكَ مُحَمَّدٍ نِ الْبَشِيرِ النَّذِيرِ، وَالسَّرَاجِ الْمُنِيرِ،
وَارْضَ اللَّهُمَّ عَنْ آلِهِ وَصَحَابَتِهِ أَجْمَعِينَ، وَعَنِ التَّابِعِينَ، وَمَنْ تَبِعَهُمْ بِإِحْسَانٍ
إِلَى يَوْمِ الدِّينِ، وَعَنَّا مَعَهُمْ بِعَفْوِكَ وَكَرَمِكَ وَإِحْسَانِكَ يَا أَرْحَمَ الرَّاحِمِينَ.
اللَّهُمَّ اغْفِرْ لِلْمُسْلِمِينَ وَالْمُسْلِمَاتِ وَالْمُؤْمِنِينَ وَالْمُؤْمِنَاتِ الْأَحْيَاءِ مِنْهُمْ
وَالْأَمْوَاتِ،

اللَّهُمَّ أَعِزَّ الْإِسْلَامَ وَالْمُسْلِمِينَ، وَدَمِّرْ أَعْدَاءَكَ أَعْدَاءَ الدِّينِ وَانْصُرْ مَنْ نَصَرَ
الدِّينَ، وَاخْذُلْ مَنْ خَذَلَ الْمُسْلِمِينَ، وَأَعْلِلْ كَلِمَتَكَ إِلَى يَوْمِ الدِّينِ.



اللَّهُمَّ انْصُرْ إِخْوَانَنَا الْمُسْلِمِينَ وَالْمُجَاهِدِينَ وَالْمُسْتَضْعَفِينَ فِي فَلَسْطِينَ وَفِي كُلِّ
مَكَانٍ، اللَّهُمَّ ثَبِّتْ إِيْمَانَهُمْ وَأَنْزِلِ السَّكِينَةَ فِي قُلُوبِهِمْ وَوَحِّدْ صُفُوفَهُمْ.

اللَّهُمَّ وَفِّقْهُمْ لِمَا فِيهِ عِزُّ دِينِكَ وَنَصْرُ شَرِيعَتِكَ، اللَّهُمَّ اجْعَلْهُمْ هُدَاةً مُهْتَدِينَ
صَالِحِينَ مُصْلِحِينَ وَاشْمَلِ اللَّهُمَّ بِعِنَايَتِكَ وَتَوْفِيقِكَ عَلَى صَاحِبِ الْجَلَالَةِ،

Kebawah Duli Yang Maha Mulia Seri Paduka Baginda Yang di-Pertuan
Agong, Sultan Ibrahim dan Kebawah Duli Yang Maha Mulia Seri
Paduka Baginda Raja Permaisuri Agong, Raja Zarith Sofiah.

وَكَذَلِكَ صَاحِبِ الْفَخَامَةِ،

Tuan Yang Terutama, Tun Dato' Seri Utama Ahmad Fuzi Bin Haji Abdul
Razak, Yang di-Pertua Negeri Pulau Pinang.

اللَّهُمَّ ادْفَعْ عَنَّا الْبَلَاءَ وَالْوَبَاءَ وَالْغَلَاءَ وَالرِّيَاءَ، وَالرَّبَا وَالزَّنَا وَالزَّلَازِلَ وَالْمِحْنَ وَسُوءَ
الْفِتَنِ مَا ظَهَرَ مِنْهَا وَمَا بَطَنَ عَنْ بَلَدِنَا هَذَا خَاصَّةً، وَعَنْ سَائِرِ بِلَادِ الْمُسْلِمِينَ
عَامَّةً يَا رَبَّ الْعَالَمِينَ.

Ya Allah! Dengan sifat-Mu yang Maha Pemurah dan Maha Mendengar, jadikanlah kami dan keturunan kami orang-orang yang istiqamah mendirikan solat secara berjemaah serta dapat mengeluarkan zakat dan melaksanakan waqaf melalui agensi milik penuh Majlis Agama Islam Negeri Pulau Pinang (MAINPP) iaitu Zakat Pulau Pinang (ZPP) dan Wakaf Pulau Pinang (WPP).

Ya Allah! Berilah petunjuk-Mu kepada kami dan pemimpin-pemimpin kami untuk memberikan khidmat bakti yang terbaik kepada agama, bangsa dan negara. Ya Allah! Kuatkan iman kami agar dapat menghindari perbuatan khianat, salah guna kuasa dan harta, memberi atau menerima rasuah dan segala perbuatan durjana yang merosakkan kepentingan agama, masyarakat dan negara.

رَبَّنَا آتِنَا فِي الدُّنْيَا حَسَنَةً وَفِي الْآخِرَةِ حَسَنَةً وَقِنَا عَذَابَ النَّارِ.

عِبَادَ اللَّهِ! إِنَّ اللَّهَ يَأْمُرُ بِالْعَدْلِ وَالْإِحْسَانِ وَإِيتَايَ ذِي الْقُرْبَى وَيَنْهَى عَنِ الْفَحْشَاءِ
وَالْمُنْكَرِ وَالْبَغْيِ يَعِظُكُمْ لَعَلَّكُمْ تَذَكَّرُونَ ﴿١٩﴾ فَادْكُرُوا اللَّهَ الْجَلِيلَ
يَذْكُرْكُمْ، وَاشْكُرُوا عَلَى نِعَمِهِ يَزِدْكُمْ، وَلَذِكْرُ اللَّهِ أَكْبَرُ وَاللَّهُ يَعْلَمُ مَا تَصْنَعُونَ ﴿٢٠﴾